

[Augsburg], 11. Juli 1569

An Johann Matthäus Stammler

Stadtarchiv Augsburg, EWA 1042/1.

Nobili viro, doctrina, virtute, dignitate praestanti, D. Ioanni Matthaeo Stamlero, senatori et praesidi. Domino et patrono suo colendo.<sup>1</sup>

S. Isocrates graecolatinus, cum commentarijs meis, Ornatiss[ime] D. Praeses, sub praelo est Oporini successorum: sub autumnum, vti spero, edendus. Ac ipse autor Caesareae Maiestati semel dicatus, patronum non mutat. Commentarij verò ἀδέσποτοι, vos scholarchas sui defensores expetunt. Neque verò est, quòd suspicemini, me onerare vos potius quam ornare velle: quorum hoc infantia mea, illud verecundia prohibet. Quid enim esset iniquius, quam laboriosam istam regendae scholae prouinciam, non modò non fructuosam vobis, sed etiam fraudi esse? Quid absurdius, quam me, qui à Caesare nihil expetam, nihil expectem: à vobis vllam sperare pecuniariam remunerationem? Alia est huius inscriptionis meae ratio: quam vt è praefatione cognoscere non grauemini: etiam atque etiam oro. Quam ideo ad vos mitto (Nec enim dubito, quin tua praestantia cum collegis etiam hac de re actura sit) vt si quid à scholastica simplicitate profectum, in iustum aliquorum reprehensionem incursurum videbitur, id deleatis: aut etiam totam illam consindatis. Id enim praestat, quam me studio vestri peccare: et dum gratus et officiosus esse studeo, ineptum atque importunum videri. Vale. 5. idus Quintiles. 1569.

Praestantiae tuae  
studiosiss[imus]  
Hiero[nymus] Wolfius.

<sup>1</sup>Vermerk von der Hand Stamlers: Anno 1569.